

**Uunga siunnersuut: Inissianik aningaasalersuisarneq pillugu Inatsisartut inatsisaata allanngortinneqarnera Inatsisartut inatsisaat nr. xx, xx. xxx 2019-imeersoq.**

(Inissialiortiternermut tapiissutitalimmik illulianik iluarsaassinermut, pitsanngorsaanrmut alliliinermullu taarsigassarsititsisarneq tapiissuteqartarnerlu)

(Ineqarnermut Attaveqaqatigiinnermullu Naalakkersuisoq)

**Akissuteqaat**

(Ineqarnermut Attaveqaqatigiinnermullu Naalakkersuisoq)

**Aappassaanneerreqarnera**

Inatsisartut Sanaartornermut Ataatsimiititaliaat allannguutissatut siunnersuummut isumaliutissiisummik tunniussaqqarpoq. Naalakkersuisuniit Inatsisartut Sanaartornermut Ataatsimiititaliaat allannguutissatut siunnersuummik suliaqarneranut qutsavigaarput.

Naalakkersuisut naammagisimaarlugu maluginiarpaat, sanaartornermut ataatsimiititaliap isumaqatigiissup siunnersuutip akuerineqarnissaa inassutigigaa.

Kommunit aningaasanik inissianik aningaasalersuinissamut atuinissamut pisussaaffilerneqannginnerat ataatsimiititaliamit mianernartoqartippaa, aammalu erseqqissaatigaa, tamanna qinnuteqarnissamut periarfissat pillugit paasititsiniaasoqassappat sunnuteqarsinnaasoq. Tamatuma peqatigisaanik ataatsimiititaliaq kaammattuivoq, Naalakkersuisut piaarnerpaamik kommunini suliaasanik sullissinerit assigiiarnissaat qulakkeerniarlugu piaarnerpaamik maleruagassanik aalajangersaassasut.

Tassunga tunngatillugu ilisimatitsissutigineqarsinaavoq, Ineqarnermut Attaveqaqatigiinnermullu Naalakkersuisoqarfik decembarip aallartinnerani sanaartukkanut sullissisunut isumasioqatigiissitsiniarmat, ineqarnermi taarsigassarsinissamut periarfissat assigiinngitsut, taakkunungalugu aamma inissianut aningaasalersuisarnermut inatsit ilanngullugu paasissutissiissutigineqarniarmat. Isumasioqatigiissitsisoqareerpat, taarsigassarsinissamut periarfissat assigiinngitsut pillugit quppersakkat, kiisalu KNR-imi TV-kkut ilanngussat aqqutigalugit paasititsiniaanermik aallartitsisoqassaaq. Quppersakkat aamma [www.sullissivik.gl](http://www.sullissivik.gl) kiisalu [www.naalakkersuisut.gl](http://www.naalakkersuisut.gl) aqqutigalugit saqqummiunneqassapput aammalu kommuninut tunniunneqassallutik, taamaalilluni innuttaasut pisariaqartitsinerminni aallersinnaassallutik.

Kiisalu tapersiissutitalimmik inissialiortiternermut aningaasalersuinermi 2022 qaangerlugu qulakkeerinissaq ataatsimiititaliamit mianernartoqartinneqarpoq. Kommunit aningaasartuutaasa amerlisinnaanerat ataatsimiititaliap aamma mianernartoqartippaa. Tamanna tunngavigalugu Naalakkersuisut tamatumunnga naatsorsuutigisat pillugit

ilisimatitsissasut Ataatsimiititaliap qinnutigaa. Ilisimatitsissutigineqarsinnaavoq, atuuffissamut aalajangersagaq taamaallaat inissianik aningaasalersuisarneq pillugu Inatsisartut inatsisaat naapertorlugu aamma nutarterinernut, alliliinernut pitsanngorsaanernullu tapiissuteqartoqarsinnaalersillugu allanngortinneqarmat.

Kisiannili inissiaq tapersiissutitalimmik inissialiortiternermut taarsigassarsiaqarfiuppat, taarsigassarsititsisinaanermi periarfissat allannguuteqartinneqanngillat. Inissialiornermut tapersiissutitalinnik illulianik nutarterinissamut tarsigassarsiat ineriartorneri Naalakkersuisunit malinnaaffigilluarneqassapput.

Taamatut oqaaseqarlunga Naalakkersuisut sinnerlugit immikkoortoq Inatsisartuni kajumittumik suliaannorlugu tunniuppara.